



## SIPA provjerava CIK i Ured za razmatranje žalbi



# TUŽIOCI TRAŽE NAJBOLJEG PONUĐAČA

CIK: Izbori neće (o)kasniti

• CIK: Neka institucije rade svoj posao • Kremenović: Uradili smo sve po zakonu

Iz Državne agencije za istrage i zaštitu (SIPA) potvrdili su jučer za Oslobodjenje da su njihovi pripadnici na terenu i da poduzimaju određene aktivnosti po naredbi Tužilaštva BiH, a vezano za proceduru koju je provela Centralna izborna komisija (CIK) oko izbora najboljeg ponuđača za štampanje izbornog materijala.

### Izbori po planu

CIK je po raspisanom tenderu za štampanje izbornog materijala kao najboljeg ponuđača prvenstveno izabrao firmu Zrinski iz Hrvatske, na šta se Uredu za razmatranje žalbi žalila banjalučka firma Atlantik. Ured je prihvatio Atlantikovu žalbu i donio rješenje na osnovu kojeg je posao štampanja dat toj kompaniji.

- Državna agencija za istrage i zaštitu primila je u petak, 27. juna, naredbu Tužilaštva BiH za vršenje određenih provjera i prikupljanje saznanja. Na osnovu naredbe Tužilaštva BiH, pripadnici SIPA sačinili su konkretan plan mjera i radnji koje je potrebno preduzeti u cilju realizacije predmetne naredbe. Možemo reći da su policijski službenici SIPA već na terenu i da preduzima-

ju potrebne aktivnosti, rekla je Kristina Jozić, glasnogovornica SIPA, jučer za Oslobodjenje.

SIPA će, dodala je ona, o rezultatima izvršenih provjera obavijestiti Tužilaštvo BiH, zasad drugih informacija nema. Aktivnosti SIPA će trajati dok se ne prikupe svi materijali koje je Tužilaštvo BiH zatražilo.

A šta je konkretno Tužilaštvo BiH zatražilo iz ove pravosudne institucije, još ne žele reći.

- Tužilaštvo BiH naložilo je SIPA da izvrši određene provjere. Kada provjere budu okončane, moći ćemo dati više detalja za medije, rekli su Oslobodjenju jučer iz Tužilaštva BiH.

Ni u Centralnoj izbornoj komisiji BiH ne žele davati komentare.

- Neka institucije rade svoj posao. I mi radimo svoj posao. Izbori će se provesti shodno zakonom utvrđenim rokovima i zasad sve teče po planu, kazali su nam iz CIK-a jučer.

### Pripremili dokumentaciju

Predsjedavajući Ureda za razmatranje žalbi BiH Ostoja Kremenović potvrdio je Oslobodjenju da su pripadnici SIPA u ponedjeljak bili u Uredu za ra-

zmatranje žalbi i zatražili kopije dokumentacije vezane za postupak oko žalbe Atlantika.

- U skladu sa njihovim uputstvom smo pripremili tražene materijale i sutra (danas, op.a.) ćemo im predati tu dokumentaciju. Radi se o dokumentaciji na osnovu koje smo donijeli određeno rješenje vezano za žalbu Atlantika protiv ugovorenog organa CIK-a BiH vezano za odabir najboljeg ponuđača. Rješenje je doneseno sukladno važećim zakonima i našim i ovlaštenjima i to u kratkom roku kako ne bismo usporavali cijeli postupak. Sva daljnja procedura je na ugovornom organu da postupi u skladu sa tim rješenjem. Nezadovoljna stranka može u upravnom sporu pred Sudom BiH osporavati naše rješenje i to je pravni put, kazao je Kremenović.

Postaje zapravo praksa da izbore prati skandal sa štampanjem listića. Prije četiri godine, zanimljivo, Ured za žalbe je ostao nijem na dokaze koje su nudili iz CPU, štamparije koja se žalila. No, što je još zanimljivije, još tada se pojavila i informacija da je "dogovorno" rješenje da za ove izbore listići budu štampani u Banjoj Luci. **M. D. R.**